

Pengalaman jadi perkiraan pengambilan kakitangan awam masa akan datang

29 MAR 1991

KUALA LUMPUR 28 Mac. — Kerajaan akan mengambilkira faktor pengalaman selain daripada ijazah dalam pengambilan kakitangan awam pada masa akan datang, kata Perdana Menteri.

Dato' Sri Dr. Mahathir Mohamad menambah, faktor yang sama termasuk prestasi juga akan diambil kira dalam urusan kenaikan pangkat dan penentuan gaji seseorang kakitangan awam.

Bercakap kepada para pemberita selepas merasmikan Pameran Pendidikan British di Pusat Dagangan Dunia Putra di sini hari ini, beliau menjelaskan, sudah tiba masanya penghargaan yang tinggi kepada para pemegang ijazah dinilai semula dalam penentuan jawatan, taraf dan gaji.

"Penghargaan yang tinggi juga harus diberi kepada pengalaman dan prestasi, malah tekanan perlu diberi kepada bidang - bidang khusus yang berkait rapat dengan bidang tugas seseorang itu," kata Dato' Sri Dr. Mahathir.

Menurutnya, pemegang ijazah belum boleh dikatakan berkebolehan melainkan setelah mereka mempunyai pengalaman yang cukup dan ijazah yang sesuai dengan tugas yang dijalankan.

"Justeru itu, nilai yang tinggi perlu diberikan kepada pengalaman, malah, kadangkala pengalaman harus dinilai lebih tinggi daripada ijazah.

"Pendapat umum tentang sesiapa yang mempunyai ijazah mampu membuat apa saja termasuk menjadi pentadbir atau pengurus, tidak semestinya benar," katanya.

Beliau menjelaskan, kerajaan akan menentukan pendiriannya berhubung dengan perkara itu supaya ia boleh menjadi contoh kepada pihak - pihak lain.

Menyentuh tentang bahasa Inggeris, beliau berkata, kerajaan tidak akan menjadikan bahasa tersebut sebagai mata pelajaran wajib dalam peperiksaan selagi belum yakin semua pelajar termasuk di luar bandar mendapat peluang yang sama untuk mempelajari bahasa Inggeris.

Menurutnya, tumpuan khas akan diberi kepada mereka yang di luar bandar supaya mendapat peluang yang sama menguasai bahasa Inggeris.

Mengenai cadangan mengarahkan pelajar - pelajar sekolah bertutur sepenuhnya dalam bahasa Inggeris sekarang - kurangnya sekali dalam seminggu, katanya, kerajaan sedang mempertimbangkan untuk menjadikan ia satu peraturan.

"Idea itu baik dan boleh dilaksanakan di negara ini kerana pembacaan yang tidak diikuti dengan penggunaan tidak akan membantu kita menguasai bahasa tersebut," tambahnya.

Ditanya tentang sungutan kalangan nasionalis yang tidak mahu bahasa Inggeris didaulatkan, Perdana Menteri berkata, bagi mempelajari teknologi luar, seseorang itu perlu memahami bahasa Inggeris yang diguna secara meluas.

Katanya, orang - orang Jepun pun kini menghendaki semua pengurus memahami bahasa Inggeris bagi menjalankan perniagaan mereka di luar negara.